



Siverth K. Heilmann

UPA 2023/163

Atassut

16. maj 2023

Ikiaroorartunik sakkortuunik eqqusseriartunut, tuniniaasunullu pineqaatissiisarnerup sakkortunerulernissaa pillugu Naalakkersuisut 2023 naatinnagu Naalagaaffimmut saaffiginnissuteqarnissaannik Inatsisartut aalajangiiffissaattut siunnersuut.

(Inatsisartuni ilaasortaq Aqqalu C. Jerimiassen, Atassut)

Siunnersuuteqartoq Aqqalu C. Jerimiassen qujaffigerusuppara, imatullu naatsumik Atassummiit oqaaseqarfigissavarput.

Ammasumillu nersualaaqqilaassavakkit sapiissuseqarlutit inuiaqatigiinni paqumigineqarsinnaasut ajukkutinnngivillutit ammasumik saqqummiussinnaasarakkit. Malunnarporlu inuiaqatigiinni oqallinneq annertoq pisariaqartorlu aallartikkitt. Iliuutsigulli oqariartuutigullu assigiinngitsunik allanik sunniuteqartarmata, siumungaaq eqqarsaatigereersimavat ikiaroorartoq pillugu ajornartorsiutaalersinnaasut.

Maluginiarparalu innuttaasut akornanni paasiartorneqalersoq cannabis aamma hash assigiinngissuseqarmata. Naak tusagassiorfiit suli paasiuminaatsikkaluaraat naatsorsuutigaara oqallinnerni malinnaalluarunik ilikkarumaaraat. Uanilu siunnersuummi aamma oqallisigisariaqavissoq qaqqinneqarpoq. Tassalu ikiaroorartut sakkortuut. Uteqqillaralu sakkortuut uani sammineqarmata paasillaqunarpoq.

FN-ikkummi taanna ersarissarneqarsimavoq, ikiaroorartoqartoq sakkukinnernik sakkortunernillu. Uagulli kalaallit suli taanna paasivissimannngikkippat malunnarpoq. Tassami assigiimmik suli suugaluarpataluunniit isiginiarneqarput. Qularutissaanngitsorli tassaavoq nukigut tamaasa atortariaqaratsigit, sapinngisarput tamaat ikiaroorartut sakkortunerit annertunerusumik nunatsinni eqqussorneqalinnginnissaat pinaveersaartittariaqarparput.

Malugineqallaqunarporlu, sioqqutsisumik iliuuseqarnissaq suli periarfissaammat. Kingusinaareerlutami iliuuseqarnialissagutta akiorniarnera aatsaat iluamik ajornarsissammat. Atassummiit piareersimavugut akiuinissamut pinaveersaartitsinissamullu. Naalagaaffik piiumaffigisariaqarparput annertuumik eqqussuisoqannginnissaanik sillimaqqullugit.

Taamatut naatsumik oqaaseqarlunga siunnersuuteqartoq qutsavigaara, Atassummiillu siunnersuut taperserlugu ataatsimiititaliamut innersuuppara.